

3. Lögð fram svohljóðandi tillaga borgarfulltrúa Samfylkingar, Viðreisnar, Pírata og Vinstri grænna:

Borgarstjórn samþykkir að vinna áætlun um innleiðingu á matarstefnu borgarinnar. Stofnaður verði þriggja manna stýrihópur skipaður formanni velferðarráðs, formanni skóla- og frístundaráðs ásamt fulltrúa skipuðum af borgarstjóra. Stýrihópurinn kalli til aðra formenn fagraða eftir þörfum og verkefnum. Með hópnum starfi verkefnastjóri ásamt sviðsstjórum þeirra sviða sem við á. Stýrihópurinn vinni tillögur að forgangsröðun og útfærslu aðgerðaáætlunar ásamt verk-, tíma- og kostnaðaráætlunum sem verði kynntar fyrir borgarráði og viðeigandi fagraðum.

Greinargerð fylgir tillögunni. R16030023

Samþykkt.

Borgarfulltrúar Miðflokksins og Flokks fólksins sitja hjá við afgreiðslu málsins.

Borgarfulltrúar Samfylkingarinnar, Viðreisnar, Pírata og Vinstri grænna leggja fram svohljóðandi bókun:

Meginmarkmið með mótun matarstefnu var að stuðla að betri heilsu Reykvíkinga, styrkja máltíðapjónustu og stuðla að því að borgin nái markmiðum sínum hvað varðar öryggi, sjálfbærni, lýðheilsu og hagkvæmni. Til að mæta þeim áskorunum sem við stöndum frammi fyrir viljum við auka áherslu á innleiðingu matarstefnu.

Borgarfulltrúar Sjálfstæðisflokksins leggja fram svohljóðandi bókun:

Borgarfulltrúar Sjálfstæðisflokksins telja löngu tímabært að hefja innleiðingu matarstefnunnar. Hún samrýmist manneldismarkmiðum Lýðheilsustöðvar og Landlæknisembættisins og tryggir aukna fjölbreytni og meira val. Matarstefnan var samþykkt samhljóða á fundi borgarstjórnar fyrir ríflega ári síðan (15. maí 2018) í kjölfar stefnumótunar um skólamáltíðir. Sú stefnumótunarvinna hófst í mars 2016 og hefur því tekið liðlega þrjú og hálf ár. Borgarfulltrúar Sjálfstæðisflokks undra sig á seinagangi við innleiðingu stefnunnar.

Borgarfulltrúi Sósíalístaflokks Íslands leggur fram svohljóðandi bókun:

Það eru margir jákvæðir þættir nefndir í matarstefnu Reykjavíkurborgar, líkt og að færa matargerð nær neytendum t.d. með opnun grenndargarða, það er fjallað um mikilvægi upprunamerkinga, kolefnisspor matvæla verði reiknað, næringarviðmið skilgreind og að fræðsla um næringu eigi sér stað. Þá er talað um að auka val á mat, bjóða upp á grænmetisrétti í mötuneytum og fleiri þætti. Matarstefnan tengist mörgum aðilum og nær meðal annars til máltíða á leik- og grunnskólum. Í tillögunni um innleiðingu stefnunnar kemur fram að stofnaður verði þriggja manna stýrihópur, skipuðum formanni velferðarráðs, formanni skóla- og frístundaráðs og fulltrúa skipuðum af borgarstjóra til að vinna áætlun um innleiðingu á matarstefnu borgarinnar. Stýrihópurinn kalli til aðra formenn fagraða eftir þörfum og verkefnum og verkefnastjóri ásamt sviðsstjórum þeirra sviða sem við á, starfi með hópnum. Fulltrúi Sósíalístaflokksins hefði vilja sjá í tillögunni um innleiðingu stefnunnar að fleiri sem eiga í hlut og eiga til með að borða hjá borginni og þeir sem vinna við að framleiða matinn komi að innleiðingunni sem fjallað er um í tillögunni. Eitt af meginmarkmiðum matarstefnunnar er að „Auka starfsánægju í eldhúsum borgarinnar og virðingu fyrir því starfi sem þar fer fram“, þar mætti byrja á því að hækka lægstu launin.

Borgarfulltrúi Miðflokksins leggur fram svohljóðandi bókun:

Forræðishyggja einkennir allt starf meirihlutans. Í greinargerð með tillögunni segir: „Borgarstjórn Reykjavíkur sér það sem sitt hlutverk að stuðla að því að allir íbúar borgarinnar hafi möguleika á að tileinka sér heilsusamlegan lífsstíl og þar með að borða hollan mat.“ Er

Þetta hlutverk borgarstjórnar? Hvernig ætlar meirihlutinn að uppfylla þetta hlutverk þegar fólk á ekki fyrir mat? Hvernig ætlar meirihlutinn að uppfylla þetta hlutverk sitt hjá þeim sem þurfa að leita til hjálparstofnana? Hvernig væri að koma sér niður á jörðina, hætta þessu orðagljáfri og fara að sinna lögbundnum verkefnum. Markmið þessarar tillögu er aldrei hægt að uppfylla. Borgarfulltrúi Miðflokksins styður allar aðgerðir í þá veru að þeir sem neyta matar í eldhúsum borgarinnar verði boðið upp á fjölbreytta fæðu, svo þessi bókun verði ekki misskilin.

Borgarfulltrúi Flokks fólksins leggur fram svohljóðandi bókun:

Af hverju framkvæmdarhluti stefnunnar er lagður fram akkúrat núna á fundi borgarstjórnar er kannski vegna sérkennilegs málflutnings oddvita VG í síðustu viku þar sem hún stökk fram og sagðist vilja draga úr dýraafurðum. Borgarfulltrúi Flokks fólksins hefur nokkrar áhyggjur af þessum öfgum og á því erfitt með að treysta hvað verður í reynd þótt matarstefnuplaggið virðist frekar saklaust. Borgarfulltrúa hugnast engar öfgar í þessu frekar en öðru og óttast forræðistilhneigingu meirihlutans. Í skýrslu innri endurskoðunar kemur fram að „SFS telur að matarstefna borgarinnar setji skólasviðinu þröngar skorður hvað varðar valkosti m.a. með tilliti til frekari útvistunar á þjónustu skólamötuneyta“. Þetta er áhyggjuefni. Í tillögunni er talað um að það sé grundvallarmannréttindi að hafa aðgengi að heilsusamlegum og öruggum mat. Í þessu sambandi vill borgarfulltrúi Flokks fólksins minna á að 3700 manns fengu ekki að borða í sumar þegar góðgerðarsamtök lokuðu. Hvar eru mannréttindin fyrir þennan stóra hóp? Reykjavíkurborg ber sem sveitarfélag skylda samkvæmt lögum að sjá til þess að allir fái grunnþörfum sínum fullnægt. Á ekki borgarmeirihlutinn að byrja að tryggja að allir fái að borða áður en hann fer að koma með yfirlýsingar um hvað eigi að vera á diskunum okkar?

- Kl. 19.45 víkur Heiða Björg Hilmisdóttir af fundinum og Aron Leví Beck tekur sæti.